

摘藻堂四庫全書薈要

集部

欽定四庫全書薈要卷一萬八千八百七十九

集部

御定佩文齋詠物詩選卷二百五十七

穀類

四言古

禾

魏
曹植

猗猗嘉禾惟穀之精其洪盈箱協穗殊莖昔生周朝今
植魏庭獻之廟堂以昭祖靈

穀

曹植

於穆聖皇仁暢惠渥辭獻減膳以服鰥獨和氣致祥時
雨滲漉野草萌變化成嘉穀

華黍

晉
束皙

黜黜重雲習習和風黍華陵顛麥秀丘中靡田不播九
穀斯豐奕奕玄霄濛濛甘雷黍發桐華禾挺其秀靡田
不植九穀斯茂無高不播無下不植芒芒其稼參參其
穡穡我王委充我民食玉燭陽明顯猷翼翼

庭前植稻苗贊

晉
湛方生

蓊蓊嘉苗離離階側弱葉繁蔚圓株踈植清流津根輕
露濯色

五言古

行官張望補稻畦水歸

唐杜甫

東屯大江北百頃平若案六月青稻多千畦碧泉亂插
秧適云已引濶加漑灌更僕往方塘決渠當斷岸公私
各地著浸潤無天旱主守問家臣分明見谿畔芊芊炯
翠羽剡剡生銀漢鷗鳥鏡裏來關山雪邊看秋菰成黑

米精粦傳白粲玉粒足晨炊紅鮮任霞散終然添旅食
作苦期壯觀遺穗及衆多我倉戒滋蔓

遣興

杜甫

豐年孰云遲甘澤不在早耕田秋雨足禾黍已映道春
苗九月交顏色同日老勸汝衡門士勿悲尚枯槁時來
展材力先後無醜好但訝鹿皮翁忘機對芳草

東坡

宋蘇軾

種稻清明前樂事我能數毛空暗春澤鉞水聞好語分

秧及初夏漸喜風葉舉月明看露上一一珠垂縷秋來
霜穗重顛倒相撐拄但聞畦壠間蚱蜢如風雨新舂便
入甌玉粒照筐筥我久食官倉紅腐等泥土行當知此
味口腹已吾許

糴米

蘇軾

糴米買束薪百物資之市不緣耕樵得飽食殊少味再
拜請邦君願受一廛地知非笑昨夢食力免內愧春秧
幾時花夏稗忽已穠悵然撫耒耜誰復識此意

看刈禾

明高啓

農工亦云勞此日始告成往獲安可後相催及秋晴父
子俱在田札札鏹有聲黃雲漸收盡曠望空郊平日入
負檐歸謳歌道中行鳥雀亦羣喜下啄飛且鳴今年幸
稍豐私廩各已盈如何有貧婦拾穗猶惻惻

七言古 附長短句

烏鹽角行

宋戴復古

鳳簫鼉鼓龍鬚笛夜宴華堂醉春色艷歌妙舞蕩人心

但有歡娛別無益何如邨落撈桐吹能使時人知稼穡
邨南邨北聲相續青郊雨後耕黃犢一聲催得大麥黃
一聲換得新秧綠人言此角只兒戲孰識古人吹角意
田家作勞多怨咨故假聲音召和氣吹此角起東作吹
此角田家樂此角上與鄒子之律同宮商合鐘呂形甚
朴聲甚古一吹寒谷生禾黍

杜伯淵送新米

明
楊基

山人送我山田米粒粒如霜新可喜雨春風播落紅芒

照眼如珠絕糠粃飢腸欲食未敢炊未及秋嘗羞祖禰
憶我春來歲方旱焦穗萎苗將槁矣不意茲晨見精粳
此寶更將何物比終歲勤勞農可念不耕而食余堪恥
歸買淞江雪色鱸持向高堂奉甘旨

五言律

茅堂檢校收稻

唐
杜甫

香稻三秋末平田百頃間喜無多屋宇幸不礙雲山御
袂侵寒氣嘗新破旅顏紅鮮終日有玉粒未吾慳

暫往白帝復還東屯

杜甫

復作歸田去猶殘穫稻功
築塲憐穴蟻拾穗許邨童
落杵光輝白除芒子粒紅
加餐可扶老倉庾慰飄蓬

與諸公同出城觀稼

唐白居易

老尹醉醺醺來隨年少羣
不憂頭似雪但喜稼如雲
歲望千倉積秋憐五穀分
何人知帝力堯舜正為君

田舍

明李瑋

廣陌度秋風田家門巷同
藤花金一色豆莢箸雙紅
穠

裝存生理籌車見歲功茅柴新釀得逼社醉南翁

觀稻

明石沆

稻水千區映邨煙幾處斜冷風低起樹輕浪細浮花鳥
雀深深圃鳬鷺淺淺沙社歌聲不絕于此見年華

五言排律

秋稼如雲

唐蔣防

肆目如雲處三田大有秋蔥龍初滿野散漫正盈疇稍
混從龍勢空同觸石幽紫芒紛羃羃青野澹油油始愜

倉箱望終無減裂憂西成知不遠雨露復何酬

嘉禾合穎

唐
孟簡

玉燭將成歲封人亦自歌八方霑聖澤異畝發嘉禾共
秀芳何遠連莖瑞且多穎低甘露滴影亂惠風過表稔
由神化為祥識氣和因知興嗣歲王道舊無頗

太和戊申歲大有年詔賜百寮出城觀稼謹書

盛事以俟采詩

唐
白居易

清晨承詔命豐歲閱田閭膏雨抽苗足涼風吐穗初早

禾黃錯落晚稻綠扶疎好入詩家詠宜令史館書散為
萬姓食堆作九年儲莫道如雲稼今秋雲不如

嘉禾合穎

唐闕名

天祚皇王德神呈瑞穀嘉盛時苗特秀證道葉方華氣
轉騰佳色雲披映早霞薰風浮合穎湛露淨祥花六穗
垂兼倒孤莖嬾復斜影同唐叔獻稱慶比周家

七言律

西明寺威公盆池新稻

唐唐彥謙

為笑江南種稻時
露蟬鳴後雨霏霏
蓮盆積潤分畦小
藻井垂陰擢秀稀
得地又生金粟界
結根仍對水田衣
支公尚有三吳思
更使幽人憶釣磯

六月六日雨後過嶽廟遊從封寺觀稼席上

宋韓琦

暑雨頻經信宿休
近郊方出釋潛憂
雖妨麥始三停穫
且見苗知一半收
神嶽怖民藏電雹
老松憑寺偃蛟虬
佳遊况遇從豐識
好飭千倉待有秋

觀稼

韓琦

一夕甘滋起瘁田
陡回灾沴作豐年
便晴惟恐禾生耳
將熟偏宜穀捺拳
雲退不畱驅旱迹
氣清渾露已秋天
老翁豈獨同民樂
更覺詩豪似有權

端孺糴米龍川得粳糯數十斛以歸作詩調之

宋

唐庚

倒拔孤舟入瘴煙
歸來百斛瀉豐年
炊香未數神江白
釀滑偏宜佛跡泉
飽去定知頻夢與
醉中何至便妨禪

憑君為比長安米看直公車牘幾千

丹陽道中觀稼

元張雨

行遍山東黃葉邨縱橫草路細難分荒雞戶暗蠨蛸月
落鴈天粘擺掇雲下澤車傍懸酒榼延陵祠畔讀碑文
空山更覓牛羊徑入獸依然不亂羣

秋穫喜晴

明黃佐

農事初成樂事繁即看雲水接平原巾車道上黃迷壟
社鼓聲中綠滿尊十里斷霞明鴈驚半林斜照散雞豚

豐年有願緣憂國擊壤今聞到處邨

米花

明盛或

吳下字婁傳舊俗人間兒女卜清時
釜香雲陣衝花辦
火烈春聲繞竹枝
翻笑絕糧驚雨粟
還疑煮豆泣然箕
一年休咎何須問
且醉樽前金屈卮

七言絕句

禾熟

宋孔平仲

百里西風禾黍香
鳴泉落實穀登場
老牛粗了耕耘債

齧草坡頭卧夕陽

房陵

宋陳造

夏田少雨富來年
多雨何妨穡事秋
已戒日供皮子麪
更教晚稻飽霜收

早行

宋陳與義

露侵駝褐曉寒輕
星斗闌干分外明
寂寞小橋和夢過
稻田深處草蟲鳴

豐年謠

宋王炎

滿箔春蠶得繭絲家家機杼換新衣五風十雨天時好
又見西郊稻秫肥

其二

洞丁徭戶盡歸耕篁竹無人弄寸兵要識二天恩德廣
黃雲千里見秋成

其三

睡鴨陂塘水漫流離離禾稼滿平疇共言官府催科緩
飽飯渾家百不憂

東門外觀刈熟民間租米船相銜入城喜作

宋

范成大

潮到靈橋綠繞船海邊力穡屢豐年淡青山色深黃稻
恰似胥門九月天

春日田園雜興

范成大

吉日初開種稻包南山雷動雨連宵今年不欠秧田水
新漲看看拍小橋

晚春田園雜興

范成大

湔褰水滿萊蘋洲上已微寒懶出遊
薄暮蛙聲連曉鬧
今年田稻十分秋

秋日田園雜興

范成大

秋日只怕雨垂垂
甲子無雲萬事宜
獲稻畢工隨曉穀
直須晴到入倉時

其二

新築場泥鏡面平
家家打稻趁霜晴
笑歌聲裏輕雷動
一夜連枷響到明

書館即事

元黃庚

煙拖野色入書窗
一畝平田隔草塘
暮雨初收新水滿
藕花香雜稻花香

一峰雲外庵和韻

元僧惟則

平田水語稻花香
半解羅衣受晚涼
景物雙清秋正好
亂山雲外又斜陽

秋日即事詩三章送元輔張羅山錄一

明世宗

拂暑金風動袞裳滿天商吹送新涼農家萬寶收成後
十里遙聞禾黍香

送汪伯昭遊白門伯昭將自京口至棲霞寺因

憶舊遊走筆得四絕錄一 明 李流芳

紫藤峰下麓公房松戶陰陰嶺月涼若到都門宜曉騎
姚坊廿里稻花香

御定佩文齋詠物詩選卷二百五十七

欽定四庫全書薈要卷一萬八千八百八十

集部

御定佩文齋詠物詩選卷二百五十八

麥類

五言古

耕圖

元趙孟頫

仲夏苦雨乾二麥先後熟南風吹壠畝惠氣散清淑是
為農夫慶所望實其腹酤酒醉比鄰語笑聲滿屋紛然
收穫罷高廩起相屬有周成王業后稷播百穀皇天貽

來年長世自茲卜願言仍歲稔四海盡蒙福

久麥

明陶望齡

久麥化蝴蝶蝶化寧自識翅粉漸凌亂鬚背好粧飾無
端夢為周誇言大鵬翼著書一何困矢口談道德當其
夢覺時栩栩亦暫適莫信夢中言前身一腐麥

七言古

刈麥行

宋戴復古

腰鎌上壠刈黃雲東家西家麥滿門前邨寡婦拾滯穗

饘粥有餘炊餅餌我聞淮南麥最多麥田今歲無干戈
飽飯不知征戰苦生長此方真樂土

打麥詞

明高啓

雉雛高飛夏風煖行割黃雲隨手斷疎莖短若牛尾垂
去冬無雪不相宜塲頭負歸日色白穗落連耜聲拍拍
呼兒打曬當及晴雨來怕有飛蛾生卧驅烏雀非愛惜
明年好收從爾食

五言排律

麥穗兩歧

唐鄭畋

聖慮憂千頃嘉苗薦兩歧如雲方表盛成穗更標奇瑞
露縱橫滴祥風左右吹謳謠連上苑化日逼平陂史冊
書堪重丹青畫更宜願依連理樹俱作萬年枝

餘瑞麥

唐張聿

瑞麥生堯日芄芄雨露偏兩歧分更合異畝穎仍連冀
獲明王慶寧惟太守賢仁風吹靡靡甘雨長芊芊聖德
應多稔皇家配有年已聞天下泰誰為濟西田

七言律

麥

明
申時行

芄芄秀色挺來牟
片片黃雲似水流
風作跳波時隱見
雨添新漲乍沉浮
晴畦錦漾千層潏
寒壠濤生四月秋
却怪狂瀾頻起陸
漫教文偉賦中愁

七言絕句

初夏即事

宋
王安石

石梁茅屋有灣碕
流水濺濺度兩陂
晴日煖風生麥氣

綠陰幽草勝花時

其二

荷葉初圓筍漸抽東坡南蕩正堪遊
無端墮上脩脩麥橫起風寒占作秋

莫田

宋 劉子翬

打麥逢逢上莫田兒童拾穗笑爭先
市頭米價新來賤一醉瓷甌五六錢

初夏

宋 范成大

晴絲千尺挽韶光
百舌無聲燕子忙
永日屋頭槐影暗
微風扇裏麥花香

初四日東郊觀麥苗

范成大

去歲秋霖麥下遲
臘殘一雪潤無泥
相將飽喫滹沱飯
來聽林間快活啼

春日田園雜興

范成大

高田二麥接山青
傍水低田綠未耕
桃杏滿邨春似錦
踏歌椎鼓過清明

夏日田園雜興

范成大

二麥俱收斗百錢
田家喚作小豐年
餅爐飯甑無飢色
接到西風熟稻天

秋曉出郊

宋楊萬里

初日新寒正曉霞
殘山潯水稍人家
霜紅半臉金嬰子
雪白一川蕎麥花

江山道中蠶麥大熟

楊萬里

黃雲割路幾肩歸
紫玉炊香一飯肥
却破麥田秧晚稻

未教水牯卧斜暉

麥

楊萬里

無邊綠錦織雲機
全幅青羅作地衣
此是農家真富貴
雪花銷盡麥苗肥

行郊外

元張養浩

雲駁疎陰漏日華
隴隴晨色散林鴉
馬前怪底猶明月
路轉滿川蕎麥花

九日省舅氏郭西獨行因書所見

元
曹伯啓

浩浩陰風釀宿霾
道邊佛剎記曾來
蕎花不識秋光老
猶向桑陰密處開

喜晴

元
楊載

檐外喧喧鵲報晴
夕陽猶照小窗明
迴舟更倚南風順
要聽田家打麥聲

絕句

明
劉基

槐葉陰陰覆短牆
微風細雨麥秋涼
如何一歲三春景

不及閒窗午夢長

送別叔銘出順承門

明 鐺 崧

送客出城秋已涼
太行南上楚天長
順承門外斜陽裏
蕎麥花開似故鄉


懷友

明 僧德祥

湖草青青上客舟
辛夷花老麥初秋
一春多少懷人夢
半在鄉山雨外樓



御定佩文齋詠物詩選卷二百五十八



總校官庶吉士臣侍朝

校對官修撰臣張書勲

校對官庶吉士臣嚴福

謄錄監生臣陸學稼

謄錄監生臣徐大豐

欽定四庫全書薈要

集部

御定詠物詩選卷二百

五十九至
七十四

詳校官原任主事

臣

李斯咏

欽定四庫全書薈要卷一萬八千八百八十一

集部

御定佩文齋詠物詩選卷二百五十九

蔬菜類

五言古

雨後行菜

宋蘇軾

夢回聞雨聲喜我菜甲長
平明江路濕並岸飛兩槳
天真富有乳膏瀉黃壤
霜根一番滋風葉漸俯仰
未任筐筥載已作杯按想
艱難生理窄一味敢專饗
小摘飯

山僧清安寄深賞芥藍如茵萐脆美牙頰響白菰類羔
豚冒土出蹠掌誰能視火候小竈當自養

元修菜并序

蘇軾

菜之美者有吾鄉之巢故人巢元修嗜之余
亦嗜之元修云使孔北海見當復云吾家菜
耶因謂之元修菜余去鄉十有五年思而不
可得元修適自蜀來見余於黃乃作詩使歸
致其子而種之東坡之下云

彼美君家菜鋪田綠茸茸豈莢圓且小槐芽細而豐種
之秋雨餘擢秀繁霜中欲花而未萼一一如青蟲是時
青裛女來擷何怱怱烝之復湘之香色蔚其饒點酒下
鹽豉縷橙芼薑蔥那知雞與豚但覺放筯空春盡苗葉
老耕翻煙雨叢潤隨甘澤化煖作青泥融始終不我負
力與糞壤同我老忘家舍楚音變兒童此物獨斌媚終
年繫余胃君歸致其子囊盛勿函封張騫移首啗適用
如葵菰馬援載薏苡羅生等蒿蓬懸知東坡下墾鹵化

千鍾長使齊安民指此說兩翁

食煮菜簡呂居仁

宋韓駒

曉謁呂公子解帶浮屠宮畱我具朝餐喚奴求晚菰洗
箸點鹽豉鳴刀芼薑蔥俄頃香馥坐雨聲傳鼎中方觀
翠浪涌忽變黃雲濃爭貪飲鉢煖不覺定盃空憶登金
山頂僧飯與此同還家不能學空費烹調功硬恐動牙
頰冷愁傷肺胷君獨得其妙堪持餉衰翁異時聞豪氣
愛客行庖豐殷勤故煮菜知我林下風人生各有道旨

蓄用禦冬今我無所營枵腹何由充豈惟臺無餽菜把
尚不蒙念當勤致此亦足慰途窮

種菜

宋 劉子翬

傍舍植柔蔬攜鋤理荒穢桔槔勤俯仰一雨功百倍朝
來綠映土新葉搖肺肺牛羊勿踐畦肉食屠爾輩

謝馬善卿送菜

明 孫 作

嘗欣食菜美自謂肉不過今晨齒頰間屢嚙安敢唾持
梁嚙肥鮮野蔌誰當課使君可憐人異味諳小大我本

江南樵酸寒羹不和空腸轉藜莧糲粟連糠糲雨韭春
割苗霜菰秋飮座羊蹄釀旨蓄蒲鰕雜細剉芋魁掘地
底茭首洗泥科木魚三百頭竹筍一萬箇朝湘出山廚
夕煮吹煙銚堆盤青黃具入口生澀奈以茲媚盤餐頗
復如君作採之諒有時蒸或躬自佐白鹽點蔥橙紅椒
羅臼磨蔗錫質劑調釀醯芳辛破香飯炊屢熟宿酒醒
方餓驚掌推不受鼈褰空欲蛻饋案連十罌飽食深自
荷霜根咀寒齏三歎論奇貨冰壺奪仙厨適口騰軒簸

四海一東坡拙摘常坎坷參軍半畝菜詩句劇嘲賀我
憊不償一造物知何那抱甕力不任負鋤筋苦墮亦欲
賦歸田自種百畝稔傳君作菜法華蕘旋封裹食勤不
媿天日晏從高卧

紫芥

明
吳寬

惟芥本菜類秋深掇而藏此種乃野生已向春初長紫
花布滿地葉嫩亦堪嘗氣味既不辛却與芥同行北人
無不食木枿與草芒入盤以油和齒頰流肥香

七言古 附長短句

春菜

宋 蘇軾

蔓菁宿根已生葉，韭芽戴土拳如巖。
爛蒸香薺白魚肥，碎點青蒿涼餅滑。
宿酒初消春睡起，細履幽畦掇芳辣。
茵陳甘菊不負渠，鱸縷堆盤纖手抹。
北方苦寒今未已，雪底菠薐如鐵甲。
豈如吾蜀富冬蔬，霜葉露芽寒更茁。
久拋松菊猶細事，苦筍江豚那忍說。
明年投劾竟須歸，莫待茵搖并髮脫。

次韻子瞻春菜

宋黃庭堅

北方春蔬嚼冰雪妍暖思米南山蕨韭苗水餅姑置之
苦菜黃雞羹粳滑蓴絲色紫菰首白羹蒿牙甜痺頭辣
生藟入湯翻手成芼以薑橙誇縷抹驚雷菌子出萬釘
白鷺截掌鼈解甲琅玕林深未飄籜軟炊香杭煨短茁
萬錢自是宰相事一飯且從吾黨說公如端為苦筍歸
明日青衫誠可脫

秋蔬

宋張耒

荒園秋露瘦韭葉色茂春菰甘勝蕨人言佛見為下筋
芼炙烹羹更滋滑其餘瑣屑皆可口蕪菁脆肥薑薤辣
藏鞭雞筍纖玉露映葉乳茄濃黛抹已殘枸杞只留枿
晚種萵苣初生甲南來食魚忘肉味久思吾土牛羊茁
軟炊一飽老有味痛飲百壺今不說蒲團齋罷欠伸時
自覺少年心解脫

順老寄菜花乾戲作長句

宋韓駒

道人禪餘自鋤菜小摘黃花日中曬峨眉楳脯久不來

麴糝薑絲典型在封題寄我紙作囊中有巴蜀齋廚香
起炊曉甑八月白配此春盤一掬黃

稷軟木耳八月白稻名也

鹹齏十韻

宋陸游

九月十月屋瓦霜家人共畏畦蔬黃小罌大甕盛滌濯
青菰綠韭謹蓄藏天氣初寒手訣妙吳鹽正白山泉香
挾書旁觀稚子喜洗刀竭作廚人忙園丁無事卧曝日
棄葉狼藉堆空廊泥為緘封糠作火守護不敢非時嘗
人生各自有貴賤百花開時促高宴劉伶病醒相如渴

長魚大肉何由薦凍齏此際價千金不數狐泉槐葉麪
摩挲便腹一欣然作歌聊續冰壺傳

食生菜

宋葛長庚

殘風剩雨放春晴久醉欲醒何由醒枕上扶頭更解醒
五官六吏皆失寧滿園蒿苳間蔓菁火急掣鈴呼庖丁
細膾雨葉縷風莖酢紅薑紫銀鹽明豆鵲麻膏和使成
食如辣玉兼甜冰毛骨灑灑心泠泠

蔬圃

元許有孚

有池可汲園可斲拂袖歸來心願足自甘學圃為小人
愛此菜茹并苜蓿元修雨後脆且腴諸葛數榮蔓濃綠
蘿蔔生兒芥有孫芋魁出水頻澆沃罷鋤時或釣池魚
隱几何曾夢蕉鹿既無抱甕老翁勞亦免趨炎脅肩辱
吾嘗寓甲第紛紛厭粱肉吾今且烹葵食鬱雜野藪彼
紫駝峰出翠釜爭如菰韭侑炊粟五侯之鯖世所貴五
辛之盤吾亦欲庸人皆被富貴熏或羨吾饗是清福但
令此色毋駐顏雋味齧根充我腹三年不窺慚仲舒吾

儕何可輕樊須九月築場十月滌連年藉此輸官租

菜適為余唐卿賦

明高啓

柱桐里中君始歸菜花滿園黃蜂飛桔槔倚樹長不用
江南雨多山土肥方畦獨遶看新綠晚食何須尚思肉
翠縷登盤春薤香金釵出盎冬薤熟我家亦在萼菰鄉
秋風便應歸共嘗潮州司馬成何事回首空愁足萬羊

五言律

藍上采石芥寄前李明府

唐錢起

淵明遺愛處山芥綠芳初玩此春陰色猶滋夜雨餘隔
谿煙葉小覆石雪花舒采采還相贈瑤華洵不如

白菜

元許有士

土羔新且嫩筐筍薦紛披可作青精飯仍攜玉版師清
風牙頰響真味士夫知南土稱秋末投簪要及時

五言排律

蔬圃

宋陸游

山翁老學圃自笑一何愚
硯瘠纔三畝勤劬賴兩奴
正

方畦畫局微潤土融酥剪闢荆榛盡鉏犁磊塊無過溝
橫略約聚甃起浮屠隙地成瓜援餘工及芋區如絲細
生菜似鴨爛蒸壺此事今真辦東歸不為鱸

七言律

偶掇野蔬寄襲美

唐
陸龜蒙

野園煙裏自幽尋嫩甲香蕤引漸深行歇每依鴉舅影
挑頻時見鼠姑心凌風藹彩初攜籠帶露虛疎或貯襟
欲助春盤還愛否不妨蕭灑似家林

魯望以躬掇野蔬兼示雅什用以酬謝

唐皮日休

杖摘春煙煖向陽煩君為我致盈筐深挑乍見牛脣液

爾雅云薺牛細掐徐聞鼠耳香

本草云葉似鼠耳莖赤可生食

紫甲採

從泉脉畔翠牙搜自石根旁雕胡飯熟醍醐軟不是高
人不合嘗

挽蔬

宋朱子

未覺閒來歲月頻荷鋤方喜土膏勻連畦已放瑤簪露

覆地行看玉本新
小摘登盤先餉客
晚餐當肉更宜人
却憐寂寞公儀子
拔盡園蔬不歎貧

芥虀

宋楊萬里

茆薑辛辣最佳蔬
蓀芥芳心不讓渠
蟹眼嫩湯微熟了
驚兒新酒未醒初
棖香醋釀作三友
露葉霜芽知幾鋤
自笑枯腸成破甕
一生只解貯寒菹

趙尉送菜

宋戴昺

虛老空山學圃翁
荷鋤頭白雪髯
鬆芥臺如薛何曾夢

菜腦生筋漫自供，不料官園蒼玉束。
絕勝禁鬻紫駝峰，更煩詩手剪春雨。剩與一番風露習。

五言絕句

同羣公題張處士菜園

唐高適

耕地桑柘間，地肥菜常熟。
為問葵藿資，何如廟堂肉。

芥

宋劉子翬

葉實把芳辛，氣烈消煩滯。
登俎效微勞，乍食驚頻噉。

題蘇希亮畫

宋裘萬頃

石梁度山澗上有秦人居歲寒不種桃汲泉灌嘉蔬

溼陽後菴

金元好問

韭早春先綠菰肥秋未黃殷勤繞畦水終日為君忙

題畫菜

明錢宰

綠酒交春熟燈花入夜開兩畦堪小摘不見故人來

其二

今日荷鉏倦嘉蔬沒四垣客來春酒綠風雨夜開園

七言絕句

尋山家

唐
長孫佐輔

獨訪山家歇還涉茅屋斜連隔松葉主人聞語未開門
繞籬野菜飛黃蝶

食蔬

唐
陸龜蒙

日午空齋帶睡痕水蔬山藥薦盤飧林鳥信我無機事
長到而今下石盆

洛城雜詩

宋
韓維

上東門外春三月桑葉陰陰覆菜花密竹亂流行徑絕

桔槔鳴處是人家

擷菜

宋蘇軾

秋來霜露滿東園
蘆菹生兒芥有孫
我與何曾同一飽
不知何苦食雞豚

二月二日挑菜節大雨不能出

宋張耒

久將菰芥芼南羹
佳節泥深人未行
想見故園蔬甲好
一畦春水輓轡聲

春日懷淮陽

張耒

最愛南城汲井園
春來蔬甲不勝繁
人家斷處無雞犬
遲日東風似古原

春日田園雜興

宋 范成大

桑下春蔬綠滿畦
菰心青嫩芥臺肥
谿頭洗擇店頭賣
日暮裹鹽沽酒歸

晚春田園雜興

范成大

紫青萸葉卷荷香
玉雪芹芽拔薤長
自擷谿毛充晚供

短篷風雨宿橫塘

其二

茅針香軟漸色茸蓬蒿甘酸半染紅采采歸來兒女笑
杖頭高挂小筠籠

冬日田園雜興

范成大

撥雪挑來踏地菰味如蜜藕更微濃朱門肉食無風味
只作尋常菜把供

野菜

宋陸游

老農飯粟出躬耕，捫腹何殊享大烹。
吳地四時常足菜，一番過後一番生。

其二

雨過寒聲滿背蓬，如今真是荷鋤翁。
自憐遇事常遲鈍，九月區區種晚菘。

巢菜

陸游

昏昏霧雨暗衡茅，兒女隨宜治酒肴。
便覺此身如在蜀，一盤籠餅足踈巢。

宿南嶺驛

宋 楊萬里

蕨手猶拳已筍長菊苗初甲可羹嘗山邨佳味無人享
一路春風野菜香

至後入城道中雜興

楊萬里

畦蔬甘似卧沙羊正為新經幾夜霜蘆服過拳菰過膝
北風一路菜羹香

新春喜雨

宋 徐璣

農家不厭一冬晴歲事春來漸有形昨夜新雷催好雨

蔬畦麥隴最先青

雨後

金馮辰

東風花外錦鳩啼喚起西山雨一犁綠滿蔬畦人不到
桔槔閒立夕陽低

翰林故事莫盛於唐宋聊述舊聞擬宮詞十首

錄一

元表楠

春帖分裁閣分多宮娥爭餽纈綃羅青絲菜餅銀盤送
幡勝新題墨旋磨

洪州歌

元柳貫

女兒頭戴角冠歌
勾葉垂垂彈鬢齊
十里來城肩擔重
新晴菜把賤如泥

題菜

元貢性之

西風吹動錦爛斑
曉起窺園露未乾
三日宿醒醒不得
正思風味到辛盤

春菜

元張雨

土甲離離宿雨痕
畦蔬小摘當盤飧
紅綾餅餤殘牙齒

合向巖頭嚼菜根

山居吟

元僧清珙

山形凹凸路高低石占雲頭屋占蹊地窄栽來蔬菜少
又營小圃過橋西

西園即事

明高啓

綠池芳草滿晴波春色都從雨裏過知是鄰家花落盡
菜畦今日蝶來多

答楊署令送菜

明徐賁

隙地知君手自栽
紺牙紅甲雨中開
閒居我亦清齋久
肯折新葵為送來

縣舍即事

明 葉子奇

朝日開衙暮散衙
略無一刻及春華
偶過縣舍坡陀外
隨分春風領菜花

畫菜

明 任 衢

露牙煙甲曙光寒
紫翠溥香濕未乾
記得花開曾病酒
玉人纖手薦春盤

御定佩文齋詠物詩選卷二百五十九

欽定四庫全書薈要卷一萬八千八百八十二

集部

御定佩文齋詠物詩選卷二百六十

雜蔬類

五言古

百合

梁宣帝

接葉有多種開花無異色含露或低垂從風時偃抑

行園

梁沈約

寒瓜方卧壟秋菰亦滿陂紫茄紛爛漫綠芋鬱參差初

松向堪把時韭日離離高梨有繁實何減萬年枝荒渠
集野鴈安用昆明池

續古詩

唐白居易

朝采山上薇暮采山上薇歲晏薇亦盡飢來何所為坐
飲白石水手把青松枝擊節獨長歌其聲清且悲樵馬
非不肥所苦長繫維豢豕非不飽所憂竟為犧行行歌
此曲以慰長苦飢

北人以松皮為菜予初不知味虞侍郎分餉一

小把因飯素授廚人與園蔬雜進珍美可喜

因作一詩

宋朱弁

吾老似出家晚悟媿根鈍滋旨却羶葷禪悅要親近偉
哉十八公茲道亦精進舍身奉刀几割體絕嗔恨鱗皴
老龍皮鳴齒溢芳潤流膏為伏龜千歲未須問便堪奴
筍巖詎肯友芝菌跣趺得一飽萬事皆可擯侍郎文懿
後落落衆推俊澹然世味薄內典得所信香廚畱淨供
頻食不言頓晏然默不語草木雷音震得法於此公骨

髓傳心印應憐持節人
餉此為問訊欲將無上味為我
洗塵室食之不敢餘感激在方寸

采芹

明僧宗泐

深渚芹生密淺渚芹生稀
采稀不濡足采密畏沾衣清
晨攜筐去及午行歌歸道逢李將軍
馳獸春乘肥

七言古

郭圃送蕪菁感成長句

宋張耒

蕪菁至南皆變菰菰美在上根不食
瑤簪玉筍不可見

使我每食思故國西鄰老翁知我意盈筐走送如雪白
蒸烹氣味元不改今晨一餐兼南北孔明用蜀最艱窘
百計捃拾無遺策當時此物助軍行渭上褒中有遺植
英雄臨事究瑣屑終服奇才屈強敵想見躬耕自灌畦
當時有意誰能測

豆苗

宋方岳

江南之筍天下奇春風匆匆吹上籬秦郵之薑肥勝肉
遠莫致之長負腹先生一鉢同僧居別有方法供齋蔬

山房掃地布豆粒不須勤荷煙中鋤手分瀑布灑作雨
覆以老瓦如穹廬平明發視玉髯磔一夜怒長堪冰苴
自親火候淪魚眼帶生芼入晴雲盃碧絲高壓涎滑尊
脆響平欺辛螯燂晚菰早韭各一時非時不到詩人脾
何如此雋咄嗟辦庾郎處貧未為慣

五言律

芹

宋朱子

晚食寧論肉知君薄世榮瓊田何日種玉本一時生白

鶴今休誤青泥舊得名收單還炙背北闕儻關情

畦樂園

明 劉永之

郭南抱甕者久與世情疎砌長龍須草林開燕尾渠
轆轤花下轉蒿苳雨中鉏蔗熟能相寄酬君薤葉書

五言絕句

菰

宋 劉子翬

周郎愛晚菰對客蒙稱賞今晨喜薦新小嚼冰霜響

七言絕句

謝楊履道送銀茄

宋黃庭堅

藜藿盤中生精神珍蔬長蒂色勝銀朝來鹽醃飽滋味
已覺瓜瓠漫輪囷

其二

君家水茄白銀色殊勝壩裏紫彭亨蜀人生蔬不下筯
吾與北人俱眼明

其三

白金作顆非種成中有萬粟嚼輕冰戎州夏畦少蔬供

感君來飯在家僧

其四

畦丁收盡垂露實
葉底猶藏十二三
待得銀包已成穀
更當乞種過江南

題秋茄圖

元錢選

憶昔毗山愛寫生
瓜茄任我筆縱橫
自憐老去翻成拙
學圃今猶學不成

翠巖流壑

元黃公望

石磴連雲暮靄霏翠微深香玉泉飛谿迴寂靜塵蹤少
惟許山人共採薇

題菰菜圖

元陳高

栗里園荒舊日歸手栽菰菜雨根肥只今客裏看圖畫
惆悵紅塵滿目飛

御定佩文齋詠物詩選卷二百六十

欽定四庫全書薈要卷一萬八千八百八十三

集部

御定佩文齋詠物詩選卷二百六十一

瓜類

五言古

寄姚司馬

唐張說

共君春種瓜本期清夏暑瓜成人已去失望將誰語
露摘香園感味懷心許偶逢西風便因之寄鄂渚

種瓜

唐韋應物

率性方鹵莽理生尤自疎今年學種瓜園圃多荒蕪衆
草同雨露新苗獨翳如直以春窘迫過時不得鋤田家
笑枉費日夕轉空虛信非吾儕事且讀古人書

五言律

瓜

唐李嶠

欲識東陵味青門五色瓜龍蹄遠珠履女臂動金花六
子方呈瑞三仙實可嘉終朝奉締綍謁帝佇非賒

南山下與老圃種瓜

唐孟浩然

樵牧南山近林廬北郭賒先人畱素業老圃作鄰家不
種千株橘惟資五色瓜邵平能就我開徑剪蓬麻

薛氏瓜廬

宋趙師秀

不作封侯念悠然遠世紛惟應種瓜事猶被讀書分野
水多於地春山半是雲吾生嫌已老學圃未如君

題薛景石瓜廬

宋徐照

何地有瓜廬平湖四畝餘自鋤畦上草不放手巾書人
遠來求字童閒去釣魚山民山上住却羨水邊居

題薛景石瓜廬

宋徐璣

近舍新為圃澆鋤及晚涼因看瓜蔓吐識得道心長隔
沼嘉蔬潔侵畦異草香小舟應買在門外是漁郎

七言律

食西瓜

元方夔

恨無纖手削駝峰醉嚼寒瓜一百筩縷縷花衫粘唾碧
痕痕丹血掐膚紅香浮笑語牙生水涼入衣襟骨有風
從此安心師老圃青門何處問窮通

橫山下種瓜作

明王寵

山田犂确苦多沙，學種東陵五色瓜。
激澗即看穿石竹，挿籬偏自愛藤花。
囊中未得餐霞法，谿上時畱泛海槎。
長日輟耕無一事，只須牛角挂南華。

五言絕句

柳枝

唐李商隱

嘉瓜引蔓長，碧玉冰寒漿。
東陵雖五色，不忍值牙香。

七言絕句

致中惠瓜成二絕

宋 劉子翬

故人夙有瓜畦約走送筠籃百里間
翠甌瓊罌纔一握極知風味勝黃斑

其二

柘漿潤潤香浮玉蘇水沈沈色弄金
那似甘瓜能破暑一盤霜露沍清襟

夏日田園雜興

宋 范成大

晝出耘田夜績麻邨莊兒女各當家
兒童未解供耕織

也傍桑陰學種瓜

西域嘗新瓜

元 耶律楚材

西征軍旅未還家
六月攻城汗滴沙
自愧不才還有幸
千風涼處剖新瓜

灤京雜詠

元 楊允孚

雖然玉宇桂無花
秋比江南分外嘉
絃管畫樓人散去
舍郎攜妓勸嘗瓜

剖瓜仕女圖

元 倪瓚

月彎削破翠團團六月人間風露寒誰覓東陵故侯去
但知華屋薦金盤

題畫瓜

明 聶大年

翠實離離引蔓秋西風涼露滿林丘東門尚有閒田地
千載何人說故侯

御定佩文齋詠物詩選卷二百六十一

欽定四庫全書薈要卷一萬八千八百八十四

集部

御定佩文齋詠物詩選卷二百六十二

豆花類

五言律

架邊

明謝榛

閒庭秋一色滿架豆花垂薄俗存吾計衰年習土宜煙
中晚雀定露下候蟲知何限幽人意臨風獨立時

五言絕句

晚涼

明僧宗泐

晚涼池上亭坐來心似水
雨過竹林青風吹豆花紫

七言絕句

江南

唐陸龜蒙

邨邊紫豆花垂次
岸上紅梨葉戰初
莫怪煙中重回首
酒家青紵一行書

憶汪遜齋

元戴良

四明羈客近如何
別去今纔一月過
記得小齋多野思

豆花陰裏唱離歌

偶睡

明高啓

竹間門掩似僧居
白豆花開片雨餘
一榻茶煙成偶睡
覺來猶把讀殘書

新秋示盛伯宣

明鍾泰

暑退新涼透碧紗
砧聲不斷是誰家
酒醒小立殘陽裏
閒數籬邊紫豆花

為僧朗碧天題扇寄人

明史鑑

玉簾峰下雨來時
索我閒吟寄遠詩
蕉葉滿庭松子落
竹林啼鳥豆花垂

憶王屋山人

明孫一元

幾時不見鹿皮翁
回首碧雲天自東
記得去秋新月夜
豆花棚下說年豐

訪葛徵君

明謝榛

西城閒訪葛洪家
籬落秋餘白豆花
高枕自知無俗夢
數椽茅屋在煙霞

種豆

明
王穉登

庭下秋風草欲平
年饑種豆綠陰成
白花青蔓高於屋
夜夜寒蟲金石聲

酒次與吳文學

明
居節

對酒無言興盡還
豆花棚下有青山
明朝欲釣鱸魚去
君若來時恐未閒

秋日過子問郊居

明
王伯稠

映竹緣谿三兩家
陰陰樹影日將斜
翩翩黃蝶穿疎蓼

唧唧秋蟲語豆花

涼生豆花

王伯稠

豆花初放晚涼淒
碧葉陰中絡緯啼
貪與鄰翁棚底話
不知新月照清谿

御定佩文齋詠物詩選卷二百六十二

欽定四庫全書薈要卷一萬八千八百八十五

集部

御定佩文齋詠物詩選卷二百六十三

蓴菜類

長短句

題彥臯蓴軒

明

陳璧

芙蓉花冷煙作雨
鯉魚風生紫蓴渚
軒前秋容浩誰主
江人倚楫煙中語
纖莖采香光漉漉
冰絲齊穿水晶綠
蓴有羹菰有米
綵衣奉壽阿母喜
平生宦情一杯水

七言絕句

答朝士

唐

賀知章

銀鏤銀盤盛蛤蜊
鏡湖蓴菜亂如絲
鄉曲近來佳此味
遮渠不道是吳兒

西湖采蓴曲

明

沈明臣

西湖蓴菜勝東吳
三月春波綠滿湖
新樣越羅裁窄袖
著來人說是羅敷

蓴菜

明

陸樹聲

陸瑁湖邊水漫流洛陽城外問漁舟
鱸魚正美蓴絲熟不到秋風已倦游

蓴菜

明徐桂

波心未吐心如結水葉初齊葉尚含
脂自凝膚柔繞指轉教風味憶江南

其二

鮫紵紛紛散作絲龍涎宛宛滑流匙
詩人采芣元從水莫誤嘉蔬嗔露葵

御定佩文齋詠物詩選卷二百六十三

欽定四庫全書薈要卷一萬八千八百八十六

集部

御定佩文齋詠物詩選卷二百六十四

菌類

附石耳

七言古

附長短句

答永新宗令寄石耳

宋

黃庭堅

飢欲食首山薇渴欲飲潁川水
嘉禾令尹清如冰寄我
南山石上耳筠籠動浮煙雨
姿淪湯磨沙光陸離竹萌
粉餌相發揮芥薑作辛和味
宜公庭退食飽下筯杞菊

避席遺萍壑鴈門天花不復憶況乃桑鷺與楮鷄小人
藜羹亦易足嘉蔬遣餉荷眷私吾聞石耳之生常在蒼
崖之絕壁苔衣石腴風日炙捫蘿挽葛采萬仞側足委
骨豺狼宅佩刀買犢劒買牛作民父母今得職閔仲叔
不以口腹累安邑我其敢用鮭菜煩嘉禾願公不復甘
此鼎免使射利登嵯峨

蓴子

宋

楊萬里

空山一雨山溜急漂流桂子松花汁土膏鬆煖都滲入

蒸出葦花團戢戢戴穿落葉忽起立撥開落葉百數十
蠟面黃紫光欲濕酥莖嬌脆手輕拾色如鵝掌味如蜜
滑如萼絲無點澀傘不如笠釘勝笠香留齒牙麝莫及
菰蔗楮鷄避席揖餐玉茹芝當却粒作羹不可疏一日
作腊仍堪貯盈笈

五言律

沙菌

元
許有壬

牛羊膏潤足物產借英華帳脚駢遮地

此物生車帳卓
歇之地夏秋則

環繞其釘頭怒戴沙齋厨供玉食毳索出羶車莫作垂
跡而出涎想家園有莫邪

七言律

與參寥師園中得黃耳蕈

宋

蘇軾

遣化何時取衆香法筵齋鉢久淒涼寒蔬病甲誰能採
落葉空畦半已荒老楮忽生黃耳蕈故人兼致白芽薑
蕭然放筯東南去又入春山筍蕨鄉

五言絕句

白蕈

宋 朱子

聞說閬苑瓊田產玉芝不收雲表露烹淪詎相宜

七言絕句

上蕭家峽

宋 黃庭堅

玉筍峰前幾百家山明松雪水明沙
趨虛人集春蔬好桑菌竹萌煙蕨芽

後灤水秋風詞

元 柳貫

山郵納客供次舍土屋迎寒催瑾藏
砂頭麻姑一寸厚

雨過牛童提滿筐

御定佩文齋詠物詩選卷二百六十四

欽定四庫全書薈要卷一萬八千八百八十七集部

御定佩文齋詠物詩選卷二百六十五

瓠類

五言古

田家屋上壺

宋
梅堯臣

修蔓屋頭綴大壺
簷外垂霜乾葉猶苦
風斷根未移收
挂煙突近開充酒具
遲賤生無所用
會有千金時

五言律

種瓠

元

范梈

豈是階庭物支離亦自奇已殊凡草蔓綴得好花枝帶
雨寧無實凌霄必有為啾啾羣鳥雀從汝踏多時

秋後瓠果成一實輪囷可愛余嘉其晚成而不

羣答賦云

范梈

嘉瓠吾所愛孤高更可人不虛種植意終繫發生神有
葉誠藏用無容豈識真明年應見汝衆子亦輪囷

家園種壺作

明

朱曰藩

春柳半含黃，春鳩屋上啼。
弱苗何日引長柄，得誰攜瓠落非無用。
鴟兮愛滑稽，揮鉏不覺倦。
新月在樓西。

七言律

手植瓠材

金
劉從益

為愛葫蘆手自栽，弱條柔蔓漸繁迴。
素花飄後初成實，碧蔭濃時可數枚。
試問老禪藤綴處，何如游子杖挑來。
早知瓠落非無用，豈合江湖養不才。

五言絕句

瓠

宋
劉子翬

溉釜熟輪囷香清味仍美一綫解瓊瑤中有佳人齒

御定佩文齋詠物詩選卷二百六十五

欽定四庫全書薈要卷一萬八千八百八十八集部

御定佩文齋詠物詩選卷二百六十六

韭薤類

附蔥

五言律

秋日阮隱居致薤三十束

唐

杜甫

隱者柴門內畦蔬繞舍秋
盈筐承露薤不待致書求
束比青芻色圓齊玉箸頭
衰年關鬲冷味煖併無憂

田家

宋

梅堯臣

高樹蔭柴扉青苔點落暉荷鋤山月上尋徑野煙微老
叟扶童望羸牛帶犢歸燈前飯何有白薤露中肥

韭花

元

許有壬

西風吹野韭花發滿沙陀氣校葷蔬媚功於肉食多濃
香跨薑桂餘味及瓜茄我欲收其實歸山種澗阿

七言律

題華季充剪韭軒

明

周翼

吳下有田宜種韭高風莫笑庾郎貧翬飛畫棟青林表

玉洗行盤綠水濱
夜雨剪來茸自長
春風吹起碧初勻
客來一筯分清供
不與區區肉食人

五言絕句

韭

宋

劉子翬

肉食終三韭
終憐氣味清
一畦春雨足
翠髮剪還生

韭

明

高啓

芽抽冒餘濕
掩冉煙中縷
幾夜故人來
尋畦剪春雨

七言絕句

蔥

宋
陸游

瓦盆麥飯伴鄰翁
黃菌青蔬放筯空
一事尚非貧賤分
芼薑僭用大官蔥

御定佩文齋詠物詩選卷二百六十六

欽定四庫全書薈要卷一萬八千八百八十九

集部

御定佩文齋詠物詩選卷二百六十七

山藥類

七言古

附長短句

子平寄惠希夷陳先生服福唐山藥方因戲作

雜言謝之

宋

文同

蜀江之東山色盡如赭有道人云此是丹砂伏其下煙
雲光潤若洗濯澗谷玲瓏如刻畫我聞神仙草藥不在

凡土生是中當有靈苗異卉之根莖果然人言所出山
芋為第一西南諸郡有者皆虛名就中福唐衆稱賞肥
碩甘香天所養有時巖頭倒垂三尺壯士辭忽然洞口
直舉一合仙人掌土人入冬農事閒千篝萬鐺來此山
可憐所鬻不甚貴著價即售曾不慳往年予瞻為余說
言君所部之內此物尤奇絕後復寄書勸我當餌之滿
紙親提華岳先生訣余因購之不惜錢依方服餌將二
年其功神聖久乃覺牙牢體溢支節堅自問丹青幾時

上早生兩翅教高颺塵世如帟不可居待看鴻濛對雲
將

掘山藥歌

元
龔璠

綠薜紫藤細色子種玉綿延春透髓晴虹歲晚寒不起
託命長鑱山谷裏小隱牆東塹藥闌劉土政得方槃槃
服食相傳養生訣茂陵劉郎和露啜

五言律

象之以山藥見贈

宋
韓維

龍山有遊客贈藥滿筠籠葉漬沙泉碧苗分石竇紅
應侵曉露來喜及春風却笑丹砂遠辛勤勾漏翁

嘗山藥

明 鎬 崧

誰種山中玉修圓故自勻野人尋得慣帶雨斲來新味
益丹田煖香凝石髓春商芝亦何事空負白頭人

七言律

次韻奉和蔡樞密南京種山藥法

宋 王安石

區種拋來六七年春風條蔓想宛延難追老圃莓苔徑
空對珍盤玳瑁筵嘉種忽傳河右壤靈苗更長關西偏
故畦穿斲知何日南望鍾山一慨然

和七兄山韻湯

宋

黃庭堅

厨人清曉獻瓊糜正是相如酒渴時能解飢寒勝湯餅
略無風味笑蹲鴟打窗急雨知然鼎亂眼睛雲看上匙
已覺塵生雙併椀濁醪從此不須持

山藥

宋

朱子

怪來朽壤耀瓊英
小斲項筐可代耕
豢豹于人儘無分
蹲鴟從此不須生
雪鑱但使身長健
石鼎何妨手自烹
欲賦玉延無好語
羞論蜂蜜與羊羹

御定佩文齋詠物詩選卷二百六十七

欽定四庫全書薈要卷一萬八千八百九十

集部

御定佩文齋詠物詩選卷二百六十八

芋類

七言律

謝姜寬送芋子

明

費宏

芋魁相送滿筠籠
應念冰盤苜蓿空
此日蹲鴟真損惠
當年黃鵠漫哀窮
蒸時不厭葫蘆爛
煨處還思楮枲紅
自是菜根滋味好
萬錢誰復羨王公

五言絕句

芋魁

宋

朱子

沃野無凶年正得蹲鴟力區種萬葉青深煨奉朝食

西園

明

邊貢

庭際何所有有萱復有芋自聞秋雨聲不種芭蕉樹

七言絕句

冬日田園雜興

宋

范成大

楮拙無煙雪夜長地爐煨酒煖如湯莫嗔老婦無盤飣

笑指灰中芋栗香

漫成

元馬臻

飽霜紫芋細凝酥
旋撥寒灰出地爐
慚愧鄰家新酒熟
客來沽得滿葫蘆

御定佩文齋詠物詩選卷二百六十八

欽定四庫全書薈要卷一萬八千八百九十一

集部

御定佩文齋詠物詩選卷二百六十九

焯菜類

長短句

羅仲憲送焯菜謝以長句

宋

楊萬里

學琴自有譜相鶴自有經
疏經我繙盡不見焯菜名
金華詩裏初相識玉友尊前每相憶
坐令芥孫薑子芽一見風流俱避席
取士取名多失真向來許靖亦誤人君

不見鄭花不得半山句却叅魯直稱門生

五言律

堯

宋
朱子

靈草生何許風泉古澗旁
褰裳勤采擷投筴噀芳香
冷入玄根悶春歸翠穎長
遙知拈起處全體露真常

御定佩文齋詠物詩選卷二百六十九

欽定四庫全書蒼要卷一萬八千八百九十二集部

御定佩文齋詠物詩選卷二百七十

蘆菰類

五言古

徐夢弼以詩求蘆菰輒次來韻

金
劉迎

神農嘗草木濟世以仁愛根源列郡出品目成書載中
云萊菰根試驗頗為大昌谷嘔時須文園渴嘗待食異

地黃并效與蕪菁速豈惟齒衆藥政自冠諸菜五州風
土宜罽布畦壠對壘鉏盡衆力封培窮百態翠角春雨
中黃花晚煙外日送盤箸資歲給餅罌賴片玉出頭顱
層冰起膚背脆美掩蓴菜甘辛敵薑芥物生貴有用對
此一何快儲貯得沈涵棄遺免狼狽但足齊人餐何慚
楚臣佩

五言律

蘆服

元

許有壬

性質宜沙地栽培屬夏畦熟登甘似芋生薦脆如梨老
病消凝滯奇功直品題故園長尺許青葉更堪壅

五言絕句

蘿蔔

宋

劉子翬

密壤穿根蒂風霜亦飽經如何純白質近蒂却微青

蘿蔔

宋

朱子

紛敷剪翠叢津潤擢玉本寂寞病文園吟餘得深齟

御定佩文齋詠物詩選卷二百七十

欽定四庫全書薈要卷一萬八千八百九十三

集部

御定佩文齋詠物詩選卷二百七十一

蕨類

七言律

初食筍蕨

宋

楊萬里

魚鳳烹龍世浪傳，猩脣熊掌我無緣。
只逢筍蕨杯盤日，便是山林富貴天。
稚子玉膚新脫錦，小兒紫臂未開拳。
只嫌嶺外無珍饌，一味春蔬不直錢。

七言絕句

答客

元

楊 奐

仕晚自知為學拙
家貧人道治生疎
滿山薇蕨春風老
昨夜鄰翁有報書

御定佩文齋詠物詩選卷二百七十一

欽定四庫全書薈要卷一萬八千八百九十四

集部

御定佩文齋詠物詩選卷二百七十二

椒薑類

四言古

椒華頌

晉

成公綏

嘉哉芳椒載繁其實厥味惟貞蠲除百疾肇惟歲始月
正元日永介眉壽以祈初吉

椒贊

晉

郭璞

椒之灌植實繁有榛薰林烈薄醇其芬辛服之不已洞見通神

元日椒花頌

晉
劉臻妻

璇穹周迴三朔肇建青陽散輝澄景載渙美哉靈花爰采爰獻聖容映之永壽於萬

五言律

地椒

元
許有壬

凍雨催花紫輕風散野香刺沙尖葉細敷地亂條長楚

客收成裏奚童擲滿筐行厨供草具調鼎爾非良

七言律

花椒

明

僧宗林

欣欣笑口向西風噴出元珠顆顆同采處倒含秋露白
曬時嬌映夕陽紅調漿美著騷經上塗壁香凝漢殿中
鼎餽也應加此味莫教薑桂獨成功

五言絕句

椒園

唐

裴迪

丹刺罽人衣芳香留過客幸堪調鼎用願君垂采摘

江行

唐 錢起

映竹疑邨好穿蘆覺渚幽漸安無曠土薑芋當農收

薑

宋 劉子翬

新芽肌理膩映日淨如空恰似勻粧指柔尖帶淺紅

七言絕句

寄懷歸州馬判官

唐 僧齊己

三年為倖興何長高卧應多事少忙又見秋風霜裛樹

蒲山椒熟水雲香

御定佩文齋詠物詩選卷二百七十二

欽定四庫全書薈要卷一萬八千八百九十五

集部

御定佩文齋詠物詩選卷二百七十三

薺類

五言古

薺菜

宋
陸游

舍東種早韭生計如庾郎舍西種小果戲學蠶叢鄉惟
薺天所賜青青被陵岡珍美屏鹽酪耿介凌雪霜采擷
無闕日烹飪有秘方候火地爐煖加糝砂鉢香尚嫌雜

筍蕨而況汗膏梁炊稗及鸞麤得此生輝光吾饒實易
足捫腹喜欲狂一掃萬錢食終老稽山旁

七言絕句

晚春初夏絕句

宋
張耒

睡足高簷春日斜碾聲初破小龍茶樓邊綠樹飛紅盡
春色牆陰老薺花

御定佩文齋詠物詩選卷二百七十三